

Акафист святому праведному Александру, Чагринскому чудотворцу

20.02.2003 г. благословлен к употреблению Святейшим Патриархом Московским и всея Руси Алексием II.

Не утвержден для общецерковного использования.

Кондак 1

Избранный угодниче Христов и предивный чудотворче, земли нашея изрядная похвало, прославляюще прославльшаго тя Господа, приносим ти от любве сердечныя хвалебное пение сие: ты же, праведне Александре, молися о нас благодарно почитающих священную память твою, да в радости сердца зовем ти: Радуйся, праведне Александре, молитвенниче о нас пред Богом теплейший.

Икос 1

Ангел предстатель у престола Пресвятыя Троицы явился еси, праведне Александре, о людех зело бедствующих и скорбящих в мире сем, недоумьми и соблазны века сего люте обуреваемых, мы же воспоминающе чистое и боголюбивое житие твое, яко священника Бога Вышняго почитаем тя, возглашающе с любовию сицевая:

Радуйся, благодати Божия сосуде избранный;

радуйся, издетска на служение Богу себе предуготовивый.

Радуйся, рода священническаго добрая леторасле и многоплодная;

радуйся, отца твоего Стефана чадо благопослушное.

Радуйся, яко того стопам усердно последовал еси;

радуйся, учению духовному прилежно внимал еси.

Радуйся, словеса наставников твоих в сердце твоем слагал еси;

радуйся, Закону Божию день и ночь трудолюбно поучался еси.

Радуйся, праведне Александре, молитвенниче о нас пред Богом теплейший.

Кондак 2

Видя благое изволение сердца твоего, Пастыреначальник Господь наш Иисус Христос благодать священства дарова тебе, благоговейно восприим, священник непорочен Бога Вседержителя явился еси, вопия Ему в молитве и дерзновении мнозе: Аллилуиа.

Икос 2

Разум Божественных писаний стяжав, со тщанием и благоговением служение священническое совершал еси: люди окрест живущия, в расколе пребывающия, благолепным Богослужением церковных совершением в храм Божий привлекл

еси. Тии же от заблуждений погибельных ко истине обратившеся, вопияху тебе сицевая:

Радуйся, священниче наш новый и предивный;

радуйся, благочестия образе.

Радуйся, красоту Православия нам являяй;

радуйся, словом Божиим нас богато питаяй.

Радуйся, раскола ревностный обличителю;

радуйся, пагубных пороков и суеверий неленостный искоренителю.

Радуйся, неврежденная веры Христовы пламенный возвестителю;

радуйся, нравов благочестивых добрый насадителю.

Радуйся, праведне Александре, молитвенниче о нас пред Богом теплейший.

Кондак 3

Сила Духа Божественнаго осени тя, всеблаженне отче, егда умершаго без напутствия таинством покаяния со скорбию узрел еси, таже дерзновенною верою окриляем, возгласил еси умершему: востани и исповедуйся, яко тебе подобает исповедатися и с близкими твоими проститися. Абие умерый отверзе очи, знамением же крестным осенив себе, по исповедании прияв в радости Тело и Кровь Христову, паки мирно почи о Господе. Ты же благодарную песнь воспел еси Богу, иже несть Бог мертвых, но живых: Аллилуиа.

Икос 3

Имей велию ревность о славе Божией и присное попечение о пастве твоей, новый храм вместо ветхаго Святей Троице многими молитвами и трудами воздвигл еси, идеже Безкровную Жертву непорочно Богу Живу приносил еси. Вернии же вкупе с тобою в новом храме ликовствующе, глаголаху:

Радуйся, помощию Божиею храм Святей Троице из камене воздвигл еси;

радуйся, прежде онаго обителище Духа Святаго в сердце твоём устроил еси.

Радуйся, Православно поклонятися Триипостасному Божеству паству твою научивый;

радуйся, добрый путевождь ко спасению многим явивыйся.

Радуйся, стадо Христово на пажитех евангельских добре упасл еси;

радуйся, плевелы суеверий и раскольнических мудрований далече отогнал еси.

Радуйся, заблуждшия овцы во ограду Святыя Церкви возвратил еси;

радуйся, покаянию оных вельми возрадовался еси.

Радуйся, праведне Александре, молитвенниче о нас пред Богом теплейший.

Кондак 4

Бурею житейских бед и скорбей потопляеми, к тебе яко к доброму пастырю и отцу чадолюбивому вседушно притекаю: зряще милостивное к Ним добросердечие твое и сострадание, праведне Александре, утешения духовнаго исполняеми, со умилением пояху Богу: Аллилуиа.

Икос 4

Слышаша людие боговдохновенныя поучения твоя, к покаянию и исправлению жителства своего устремившися, от грехов и страстей отвращающися, в разум истинный прихождаю, и твоею учительною беседою назидаящися, образом же жития твоего умиляющися, глаголаху:

Радуйся, покаяния велегласный проповедниче;

радуйся, добродетельнаго жития богомудрый наставниче.

Радуйся, пастырю наш предобрый;

радуйся, учителю наш кроткий.

Радуйся, алчущия и жаждущия души Хлебом Небесным питая;

радуйся, скорбящия и обремененныя упованием на Матерь Божию укрепляя.

Радуйся, немощныя и страждущия благостию твоею покрывая;

радуйся, всем требующим твоея помощи милостивно сию подавая.

Радуйся, праведне Александре, молитвенниче о нас пред Богом теплейший.

Кондак 5

Боготечней звезде уподобился еси, угодниче Божий Александре, указуя спасительный путь во тьме греховней блуждающим, светом заповедей Христовых всех просвещая и вразумляя, добрых сердца в Православии утверждая, ленивых и нерадивых присно воздвизая к пению Богу: Аллилуиа.

Икос 5

Видеша множайшия люди благонравное житие твое, страннолюбие и нищелюбие, в храм Божий со усердием приходяще, святолепным лица твоего зраком утешахуся, в немже яве красота Божественнаго образа и подобия являшися, и возглашаху тебе тако:

Радуйся, Божественныя благодати приятелище;

радуйся, дарований духовных нетесное вместилище.

Радуйся, священства велелепая красото;

радуйся, пастырского подвига премудрая доброто.

Радуйся, велию веру ко Христу стяжал еси;

радуйся, непрестанную молитву в сердце твоём возгревал еси.

Радуйся, пламенную любовь к Богу и ближним показал еси;

радуйся, чистотою сердечною и смиренномудрием украсился еси.

Радуйся, праведне Александре, молитвенниче о нас пред Богом теплейший.

Кондак 6

Проповедник Православная веры и благочестия чрез все житие твое быв, праведне Александре, словом и делом сие запечатлевый; егда же престаревся, восхотел еси мало почити от трудов твоих, обаче Господь на вящший подвиг тя подвизая, в Чагринскую Покровскую обитель стопы твоя направи, ты же, повинуюся Промыслу Божию, вся во благое устрояющему, со смирением воспел еси Богу: Аллилуиа.

Икос 6

Возсияша сугубо во обители Чагринстей духовная дарования твоя, яже стяжал еси благодатию Святаго Духа, в тя всельшагося, отче праведне. Темже обитель она и насельницы ея, обретши такового пастыря и кормчаго, укрепляющего их на пути иноческаго делания, в радости сердечней сия ти глаголаху:

Радуйся, добраго подвига вождю;

радуйся, новоустроенных обители утверждение.

Радуйся, молитвы непрестанное возношение;

радуйся, к Богу присное собеседование.

Радуйся, чистых дев со Христом непорочный обручителю;

радуйся, в трудах и подвигах их усердный соревнователю.

Радуйся, яко наставлении твоими инокини в терпении укрепляхуся;

радуйся, яко воздыхании твоими козни вражия нивчтоже вменяхуся.

Радуйся, праведне Александре, молитвенниче о нас пред Богом теплейший.

Кондак 7

Хотя Человеколюбец Господь ниспослати милость Свою людям земли нашея, дарова тя в скорбех помощника, в недужех врача благодатна, отчаявшимся надеяние, лютыми помыслами и унынием смущаемым кроткаго вразумителя, и

всем во всякой нужде и обстоянии сушим добраго наставника, зовущим непрестанно ко Творцу своему: Аллилуиа.

Икос 7

Новаго тя и преславнаго чудотворца яви Господь в земли Поволжстей, егда не токмо в ближних, но и в дальних странах услышано бысть о многих чудесех, твоими молитвами совершающихся во обители Чагринстей, болящия бо от многоразличных недугов исцеляхуся, бесныя свобождахуся и вси в скорби сущия ослабу и помощь приемше, глаголаху:

Радуйся, болящих скорое врачевание;

радуйся, скорбящих благое утешение.

Радуйся, бесных от демонов избавление;

радуйся, недугующим и страждущим благодатное вспоможение.

Радуйся, помазанием освященным елеем болезни врачевавый;

радуйся, воды святя причащением и окроплением исцеления сподобивый.

Радуйся, с верою приходящим помощь неоскудно подаваяй;

радуйся, молитвами твоими от скорбных обстояний многажды избавляй.

Радуйся, праведне Александре, молитвенниче о нас пред Богом теплейший.

Кондак 8

Странное и дивное бысть таинство, егда Сердцеведец Господь даром прозрения обогати тя, отче Александре, тайны сердечныя и деяния сокровенныя не скрышася от тебе, яко всем приходящим еже житию их потребная и душеспасительная благодатию Духа Святаго возвещал еси. Людие же, слышаще таковая, со страхом и умилением вкупе с тобою вопияху Богу: Аллилуиа.

Икос 8

Всего себе на служение Богу и ближним предал еси, отче праведне, состраданием бо и милосердием ко страждущим преклоняем, не преставал еси врачевати недуги душевныя и телесныя, благодатию Божией в таинствах церковных преизобильно подаваемою. Тии же благодать сию восприемше, взываху тебе тако:

Радуйся, немощи немощных долготерпеливно понесый;

радуйся, упования еже на тя не посрамивый.

Радуйся, врачу кроткий и милостивый;

радуйся, смиренных сердцем отец чадолюбивый.

Радуйся, кающихся во гресех своих непостыдное упование;

радуйся, на путь спасения обращающихся любвеобильное ободрение.

Радуйся, подвизающимся на пути сем всеильное укрепление;

радуйся, благотекущих присное радование.

Радуйся, праведне Александре, молитвенниче о нас пред Богом теплейший.

Кондак 9

Все житие твое от юности даже до глубокой старости в молитвенном предстоянии Богу и пастырском служении провождаемое, к концу приближися. Егда же приспе время твоего отшествия, благоволил еси, да канон пасхальный пропоют тебе, таже лицу твоему светло озарившуся, тихо и мирно предал еси душу твою Богу, блаженне Александре, предстоящим окрест и надгробное пение поющим: Аллилуиа.

Икос 9

Витийства суемудрых и лютых отступников посрамишася, не могущих благодарную память изкоренити из сердец верных чад твоих. Всуе бо труждающася непокоривии, горце разориша обитель Чагринскую, обаче место погребения твоего, Промыслом Божиим сохраненное, николиже забвению предано бысть, любовию посещающим тя и зовущим:

Радуйся, блаженною кончиною Богоугодное житие твое запечатлевый;

радуйся, от земных во обители Небесных преселивыйся.

Радуйся, по трудех и подвизах твоих блаженное упокоение приявый;

радуйся, вечную жизнь со Христом во Царствии Его улучшить сподобивыйся.

Радуйся, лицом к лицу радостно ныне Того созерцай;

радуйся, и нас ко гробу твоему приходящих умиления исполняй.

Радуйся, паству твою по отшествии своем не оставивый;

радуйся, и нас от Небесных с любовию назирай.

Радуйся, праведне Александре, молитвенниче о нас пред Богом теплейший.

Кондак 10

Спасения нашего всячески взыскуя, Всеблагий Господь дарова роду сему благоутробную милость Свою: прешедшим бо летом стом по кончине твоей, приснопамятне отче Александре, обретошася целебныя мощи твоя, да вси зрящии благодать таковую, воспоют дивному во святых Своих Богу благодарственную песнь: Аллилуиа.

Икос 10

Стена твердая и заступление неодолимое обители Иверстей, восприявшей со благоговением и радостью святых мощи твоя, явился еси, праведне Александре. И паки монашествующии и прости людие с верою и любовию притекающии к честным мощем твоим, чающе прияти от тебе помощь в нуждах своих, усердно зовут ти:

Радуйся, заре пресветлая, ноши прешедшей возсиявшая;

радуйся, луче, тьму греховную разгнавший.

Радуйся, яко моления наша исполняти не престал еси;

радуйся, яко отступления и согрешения отец наших не помянул еси.

Радуйся, и нас врагом прощати по заповеди Христовой научая;

радуйся, на путь спасительного покаяния наставляя.

Радуйся, иночествующих от искушений избавление;

радуйся, от нападений демонских крепкое заступление.

Радуйся, праведне Александре, молитвенниче о нас пред Богом теплейший.

Кондак 11

Пение умиленное от любви чистых приносим ти, святче Божий, скорбьми и искушениями века сего колеблемы, зряще бо нищету свою духовную, маловерие и малодушие, друг пред другом возношение и окаменение сердечное, молим тя смиренно: испроси у Господа грехов прощение, житию исправление, да добродетельми просветившися, воспоем Богу: Аллилуиа.

Икос 11

Светильник веры Православных и столп благочестия явился еси в земли Самарстей, праведне Александре, словом, житием, верою и любовию, чистотою и смирением просиял еси, темже и нас светом твоим озари и укрепи вслед тебе непреткновенно путем заповедей Христовых ходити, да благодарственное сотворим ти пение:

Радуйся, светильниче, не под спудом, но на свещнице церковней поставленный;

радуйся, от Света Присносущнаго богато осияваемый.

Радуйся, у престола Святых Троицы о нас всемогущий предстателю;

радуйся, милосердия Божия к нам ходатаю.

Радуйся, молящихся к тебе скорый слышателью;

радуйся, смиренных и незлобивых сердцем покровителю.

Радуйся, греховного сна разгнателью;

радуйся, духовныя бодрости подателю.

Радуйся, праведне Александре, молитвенниче о нас пред Богом теплейший.

Кондак 12

Благодать велию и дерзновение в молитве еще в земнем житии твоём богато стяжал еси, праведне Александре, темже тоя благодати и нас причастники сотвори твоими богоприятными молитвами, да от греховных страстей избавльшися, в чистоте и правде проживем до конца дней наших, вопиюще Спасителю Богу: Аллилуиа.

Икос 12

Поюще твое богоугодное житие на земли, и на небеси в явлении честных мощей твоих прославление, молим тя смиренно, блаженне Александре: утверди молитвами твоими Православную веру в стране нашей, от неверия, ереси и расколов ограждая и защищая нас, да безболезненное и мирное житие проживше, тебе благодетелю и заступнику нашему хвалебное пение воспоем сицевое:

Радуйся, обители Покрова Пресвятыя Богородицы известная похвало;

радуйся, Самарския Иверския обители предивное украшение.

Радуйся, обитель сию от всякаго зла сохраняяй;

радуйся, милостиво свыше на нас призираяй.

Радуйся, избранниче Божий в сонме святых земли Российския прославленный;

радуйся, заступниче наш во дни сия многотрудныя нам дарованный.

Радуйся, всем в доброделании труждающимся помощь от Господа подаваяй;

радуйся, память твою почитающих любвеобильно посещаяй.

Радуйся, праведне Александре, молитвенниче о нас пред Богом теплейший.

Кондак 13

О всеблаженне праведне Александре, земли нашея пресветлый светильниче и изрядный чудотворче! Малаго сего моления, от недостойных устен наших тебе приносимаго, не презри, но буди нам в вере и покаянии наставник, во благочестии подвижающимся благий помощник и о спасении нашем неусыпный пред Богом молитвенник, о тебе вопиющих Господу: Аллилуиа.

Сей кондак читается трижды, затем икос 1-й и кондак 1-й.

Молитва

О великий и пречудный угодниче Христов, отче наш праведне Александре, земли Поволжския благое прозябение и ходатаю о всех zde живущих и повсюду труждающихся Православных христианах: воззри ныне на нас, недостойных, милостивым твоим оком и виждь яко зело умножишася скорби и злострадания в мире сем, во грехах и беззакониях иждиваем дни своя, данное же нам время на покаяние в суетных и многомятежных страстях провождающе, умильно просим и молим тя, заступниче наш: помози нам, чадом твоим, и испроси предстательством твоим ко Всевышнему Владыце вся яже к житию и благочестию полезная и благопотребная: болящия исцели, немощныя подкрепи, печальныя и унылыя ободри, скорбящия утеши и поверженныя возстави. Вознеси, угодниче Божий, всемошную молитву твою, да утвердится в державе нашей мир и благоденствие, благочестие и единомыслие, да пребудет во благих человецех правда и милость, в злых же страх и раскаяние, во еже престати им от зла и творити добрая, да тобою наставляеми и вразумляеми, прославим дивнаго во Святых Своих Бога: Емуже Единому подобает всякая слава, честь и поклонение, Отцу и Сыну и Святому Духу, ныне и присно, и во веки веков. Аминь.